

樂府詩集

冊六

樂府詩集

卷之六

樂府詩集卷二十一

太原

郭茂倩

編次

橫吹曲辭

橫吹曲其始亦謂之鼓吹馬上奏之蓋軍中之樂也北狄諸國皆馬上作樂故自漢已來北狄樂總歸鼓吹署其後分爲二部有簫笳者爲鼓吹用之朝會道路亦以給賜漢武帝時南越七郡皆給鼓吹是也有鼓角者爲橫吹用之軍中馬上所奏者是也晉書樂志曰橫吹有鼓角又有胡角按周禮云以鼗鼓鼓軍事舊說云蚩尤氏帥魑魅與黃帝戰於涿鹿帝乃始命吹角爲龍鳴以禦之其後魏武北征烏丸越沙漠而軍士思歸於是減爲半鳴尤更悲矣橫吹有雙角卽胡樂也漢博望侯張騫入西域傳其法於西京唯得摩訶兜勒一曲李延年

因胡曲更造新聲二十八解乘輿以爲武樂後漢以給
邊將和帝時萬人將軍得用之魏晉以來二十八解不
復具存而世所用者有黃鵠等十曲其辭後亡又有關
山月等八曲後世之所加也後魏之世有歎邏迴歌其
曲多可汗之辭皆燕魏之際鮮卑歌歌辭虜音不可曉
解蓋大角曲也又古今樂錄有梁鼓角橫吹曲多叙慕
容垂及姚泓時戰陣之事其曲有企喻等歌三十六曲
樂府胡吹舊曲又有隔谷等歌三十曲總六十六曲未
詳時用何篇也自隋已後始以橫吹用之鹵簿與鼓吹
列爲四部總謂之鼓吹並以供大駕及皇太子王公等
一曰柷鼓部其樂器有柷鼓金鉦大鼓小鼓長鳴角次
鳴角大角七種柷鼓金鉦一曲夜警用之大鼓十五曲
小鼓九曲大角七曲其辭並本之鮮卑二曰鐃鼓部其

樂器有歌鼓簫箛四種凡十二曲三曰大橫吹部其樂器有角節鼓笛簫篳篥箛桃皮篳篥七種凡二十九曲四曰小橫吹部其樂器有角笛簫篳篥箛桃皮篳篥六種凡十二曲夜警亦用之唐制太常鼓吹令掌鼓吹施用調習之節以備鹵簿之儀而分五部一曰鼓吹部其樂器如隋柷鼓部而無大角柷鼓一曲十疊大鼓十五曲嚴用三曲警用十二曲金鉦無曲以爲鼓節小鼓九曲上馬用一曲嚴警用八曲長鳴一曲三聲上馬嚴警用之中鳴一曲三聲用與長鳴同二曰羽葆部其樂器如隋鐃鼓部而加鐸于凡十八曲三曰鐃吹部其樂器與隋鐃鼓部同凡七曲四曰大橫吹部其樂器與隋同凡二十四曲黃鍾角八曲中呂宮二曲中呂徵一曲中呂商三曲中呂羽四曲中呂角四曲無射二曲五曰小

橫吹部其樂器與隋同其曲不見疑同用大橫吹曲也
凡大駕行幸則夜警晨嚴大駕夜警十二曲中警七曲
晨嚴三通皇太子夜警九曲公卿已下夜警七曲晨嚴
並三通夜警衆一曲轉次而振也

漢橫吹曲

樂府解題曰漢橫吹曲二十八解李延年造魏晉已來
唯傳十曲一曰黃鵠二曰隴頭三曰出關四曰入關五
曰出塞六曰入塞七曰折楊柳八曰黃覃子九曰赤之
揚十曰望行人後又有關山月洛陽道長安道梅花落
紫騮馬驄馬雨雪劉生八曲合十八曲

隴頭

陳後主一本無
姓氏

一曰隴頭水通典曰天水郡有大阪名曰隴坻亦曰隴
山卽漢隴關也三秦記曰其坂九回上者七日乃越上

有清水四注下所謂隴頭水也

隴頭征戍客寒多不識春驚風起嘶馬苦霧雜飛塵投錢積石水斂
轡交河津四面夕冰合萬里望佳人

同前

張籍

隴頭已斷人不行胡騎夜入涼州城漢家處處格鬪死一朝盡沒隴
西地驅我邊人胡中去散放牛羊食禾黍去年中國養子孫今著氍
毹學胡語誰能更使李輕車收取涼州屬漢家

隴頭吟

王維

長安少年遊俠客夜上戍樓看太白隴頭明月迴臨關隴上行人夜
吹笛關西老將不勝愁駐馬聽之雙淚流身經大小百餘戰麾下偏
裨萬戶侯蘇武纔爲典屬國節旄空盡海西頭

同前

翁綬

隴水潺湲隴樹黃征人隴上盡思鄉馬嘶斜月朔風急雁過寒雲邊

思長殘月出林明劍戟平沙隔水見牛羊橫行俱足一作封侯者誰
斬樓蘭獻未央

隴頭水

梁元帝

銜悲別隴頭關路漫悠悠故鄉迷遠近征人分去留沙飛曉成幕海
氣旦如樓欲識秦川處隴水向東流

同前

劉孝威

從軍戍隴頭隴水帶沙流時觀胡騎飲常爲漢國羞疊妻成兩劍殺
子祀雙鉤頓取樓蘭頭就解郅支裘勿令如李廣一作功遂不封侯

同前

車數

隴頭征人別隴水流聲咽只爲識君恩甘心從苦節雪凍弓弦斷風
鼓旗竿折獨有孤雄劍龍泉字不滅

同前

陳後主

塞外飛蓬征隴頭流水鳴漠處揚沙暗波中燥葉輕地風冰易厚寒

深溜轉清登山一回顧幽咽動邊情

高隴多悲風寒聲起夜叢禽飛暗識路鳥轉逐征蓬落葉時驚沫移
沙屢擁空回頭不見望流水玉門東

同前

徐陵

別塗聳千仞離川懸百丈攢荆夏不通積雪冬難上枝交隴底暗石
礙坡前響回首咸陽中唯言夢時往

同前

顧野王

隴底望秦川迢遞隔風烟蕭條落野樹幽咽響流泉瀚海波難息交
河冰未堅寧知蓋山水逐節赴危絃

同前

謝燮

隴阪望咸陽征人慘思腸咽流喧斷岸遊沫聚飛梁鳧分斂冰彩虹
飲照旗光試聽鐃歌曲唯吟君馬黃

同前

張正見

隴頭鳴四注征人逐貳師羌笛含流咽胡笳雜水悲湍高飛轉駛澗
淺蕩還遲前旌去不見上路杳無期

隴頭流水急流急行難度一作渡遠入隗囂營傍侵酒泉路心交賜寶

刀小婦成紈袴欲知別家久戎衣今已故

同前

江總

隴頭萬里外天崖四面絕人將蓬共轉水與啼俱咽驚湍自湧沸古
樹多摧折傳聞博望侯苦辛提漢節

霧暗山中日風驚隴上秋徒傷悲咽響不見東西流無期從此別更
度幾年幽遙聞玉關道望入杳悠悠

同前

楊師道

隴頭秋月明隴水帶關城笳添離別曲風送斷腸聲映雪峯猶暗乘
冰馬屢驚霧中寒雁至沙上轉蓬輕天山傳羽檄漢地急徵兵陣開
都護道劍聚伏波營於茲覺無度方共濯胡纓

同前

盧照隣

隴坂高無極，征人一望鄉。
關河別去水，沙塞斷歸腸。
馬繫千年樹，旌懸九月霜。
從來共嗚咽，皆是爲勤王。

同前

王建

隴水何年隴頭別，不在山中亦嗚咽。

一作嗚咽

征人塞耳馬不行，未到

隴頭聞水聲，謂是西流入蒲海。

一作去

繞龍城，隴東隴西多

屈曲。野麋飲水長簇簇，胡兵夜回水傍住。
憶著來時磨劍處，向前無井復無泉。
放馬回看隴頭樹。

同前

于漬

借問隴頭水，終年恨何事。
深疑嗚咽聲，中有征人淚。
昨日上山下，達曙不能寐。
何處接長波，東流入清渭。

同前

僧皎然

隴頭心欲絕，隴水不堪聞。
碎影搖槍壘，寒聲咽幔軍。
素從鹽海積，綠

帶柳城分日落天邊望逶迤入塞雲

秦隴逼氐羌征人去未央如何幽咽水併欲斷君腸西注悲窮漠東分憶故鄉旅魂聲攪亂無夢到遼陽

同前

鮑溶

隴頭水千古不堪聞生歸蘇屬國死別李將軍細響風凋草清哀雁落雲

同前

羅隱

借問隴頭水年年恨何事全疑嗚咽聲中有征人淚自古無長策況我非深智何計謝潺湲一宵空不寐

出關

魏徵

中原還逐鹿投筆事戎軒縱橫計不就慷慨志猶存策杖謁天子驅馬出關門請纓羈南越憑軾下東藩鬱紆陟高岫出沒望平原古木吟寒鳥空山啼夜猿旣傷千里目還驚九折魂豈不憚艱險深懷國

士恩季布無二諾侯嬴重一言人生感意氣功名誰復論

入關

吳均

羽檄起邊庭烽火亂如螢是時張博望夜赴交河城馬頭要落日劍
尾掣流星君恩未得報何論身命一作傾

同前

賈馳

河上微風來關頭樹初溼今朝關城吏又見孤客入上國誰與期西
來徒自急

同前

張祐

都城連百二雄險北

一作此

回環地勢遙尊岳河流側讓關秦皇曾虎

視漢祖亦龍顏何事梟兇輩干戈自不閒

出塞

晉書樂志曰出塞入塞曲李延年造曹嘉之晉書曰劉

疇嘗避亂塢壁賈胡百數欲害之疇無懼色援笳而吹

之爲出塞入塞之聲以動其游客之思於是羣胡皆垂
泣而去按西京雜記曰戚夫人善歌出塞入塞望歸之
曲則高帝時已有之疑不起於延年也唐又有塞上塞
下曲蓋出於此

候騎出甘泉奔命入居延旗作浮雲影陣如明月弦

同前

劉孝標

薊門秋氣清飛將出長城絕漠衝風急交河夜月明
陷敵撻金鼓摧鋒揚旆旌去去無終極日暮動邊聲

同前

王褒

飛蓬似征客千里自長驅塞禽唯有雁關樹但生榆
背山看故壘繫馬識餘蒲還因麾下騎來送月支圖

同前

楊素

漠南胡未空漢將復臨戎飛狐出塞北碣石指遼東
冠軍臨瀚海長

平翼大風雲橫虎落陣氣抱龍城虹橫行萬里外胡運百年窮兵寢
星芒落戰解月輪空巖鑣息夜斗駢角罷鳴弓北風嘶朔馬胡霜切
塞鴻休明大道暨幽荒日用同方就長安邸來謁建章宮

同前

薛道衡

高秋白露團上將出長安塵沙塞下暗風月隴頭寒轉蓬隨馬足飛
霜落劍端凝雲迷代郡流水凍桑乾烽微枯棹遠橋峻輓轡難從軍
多惡少召募盡材官伏堤時臥鼓疑兵乍解鞍柳城擒冒頓長坂納
呼韓受降今更築燕然已重刊還嗤傅介子辛苦刺樓蘭

邊庭烽火驚插羽夜徵兵少昊騰金氣文昌動將星長驅鞬汗北直
指夫人城絕漠三秋暮窮陰萬里生寒夜哀笳曲霜天斷雁聲連旗
下鹿塞疊鼓向龍庭妖雲墜虜陣暈月遶胡營左賢皆頓顙單于已
繫纓絛馬登玄闕鉤鯤臨北溟當知霍驃騎高第起西京

同前

虞世基

窮秋塞草腓塞外胡塵飛徵兵廣武至候騎陰山歸廟堂千里策將
軍百戰威轅門臨玉帳大旆指金微摧朽無勅敵應變有先機銜枚
壓曉陣卷甲解朝圍瀚海波瀾靜王庭氛霧晞鼓鼙嚴朔氣原野曠
寒暉勳庸震邊服歌吹入京畿待拜長平坂鳴騶入禮闈

上將三略遠元戎九命尊緬懷古人節思酬明主恩山西多勇氣塞
北有遊魂楊桴度隴坂勒騎一作馬上平原誓將絕沙漠悠然去玉門

輕齎不遑舍驚策驚戎軒懍懍邊風急蕭蕭征馬煩雪暗天山道冰
塞交河源霧烽黯無色霜旗凍不翻耿介倚長劍日落風塵昏

同前

竇威

匈奴屢不平漢將欲縱橫看雲方結陣却月始連營潛軍渡馬邑揚
旆掩龍城會勒燕然石方傳車騎名

同前

陳子昂

忽聞天上將關塞重橫行始返樓蘭國還向朔方城黃金裝戰馬白

羽集神兵星月開天陣山川列地營晚風吹畫角春色耀飛旌寧知班定遠獨是一書生

同前

張易之

俠客重恩光驄馬飾金裝瞥聞傳羽檄馳突救邊荒轉戰磨笄地橫行戴斗鄉將軍占太白小婦怨流黃腰褱青絲騎娉婷紅粉妝一春鷺度曲八月雁成行誰堪坐秋思羅袖拂空牀

同前

沈佺期

十年通大漠萬里出長平寒日生戈劍陰雲搖旆旌飢烏啼舊壘疲馬戀空城辛苦皋蘭北胡霜損漢兵

同前

王維

居延城外獵天驕白草連天野火燒暮雲空磧時驅馬秋日平原好射鵬護羌校尉朝乘障破虜將軍夜渡遼玉靶角弓珠勒馬漢家將賜霍嫖姚